

Na osnovu člana 14. Zakona o privatizaciji preduzeća ("Službene novine Federacije BiH", br. 27/97, 8/99, 32/00, 45/00, 54/00, 61/01,27/02 i 33/02), a u vezi sa članom 12. Zakona o agenciji za privatizaciju ("Službene novine Federacije BiH", br. 18/96 i 2/02), Upravni odbor Agencije za privatizaciju u Federaciji Bosne i Hercegovine donosi

PRAVILNIK
O PRINCIPIMA, NAČINU POSTUPANJA I PRAVILIMA PRODAJE U
PROVOĐENJU PRIVATIZACIJE PREDUZEĆA SA SPORNIM PRAVIMA,
STVARIMA, OBAVEZAMA I KAPITALOM

Član 1.

Ovim pravilnikom utvrđuju se principi, način postupanja i pravila prodaje nadležnih agencija za privatizaciju u Federaciji Bosne i Hercegovine (u daljem tekstu: nadležna agencija) čija je primjena obavezna u provođenju privatizacije preduzeća koja u svojim početnim bilansima iskazuju djelimično ili u cjelini ista prava, iste stvari, iste obaveze i isti kapital (u daljem tekstu: preduzeća sa spornom imovinom).

Član 2.

U postupku privatizacije preduzeća sa spornom imovinom nadležna agencija će se obavezno pridržavati sljedećih principa:

1. svako preduzeće sa spornom imovinom tretirat će se po principu "slučaj po slučaj" od čega će zavistiti redoslijed i način primjene ostalih principa i način daljeg postupanja nadležne agencije,
2. nadležna agencija će, u skladu sa propisima, nastojati sporazumno usaglasiti međusobne odnose između zainteresovanih strana (resorna ministarstva-preduzeća) s ciljem utvrđivanja statusa sporne imovine i strukture kapitala,
3. ako se postigne sporazum oko usklađivanja međusobnih odnosa iz prethodne tačke, nadležna agencija provodi postupak utvrđen članom 3. ovog pravilnika,
4. ukoliko se sporazum iz tač. 2. i 3. ovog člana ne postigne, nadležna agencija će kroz odobravanje programa privatizacije i početnog bilansa stanja preduzeća odlučiti o spornoj imovini.

Član 3.

Preduzeća sa spornom imovinom koja sporazumno usaglase međusobne odnose povodom istih prava, stvari, obaveza i kapitala, obavezna su izraditi program privatizacije i početni bilans stanja u skladu sa članom 4. Zakona o privatizaciji preduzeća ("Službene novine Federacije BiH", br. 27/97, 8/99, 32/00, 45/00, 54/00, 61/01,27/02 i 33/02; u daljem tekstu: Zakon) i postignutim sporazumom i dostaviti ga nadležnoj agenciji.

Rok za postizanje sporazuma iz prethodnog stava iznosi maksimalno 60 dana od dana pokretanja inicijative nadležne agencije za zaključivanje istog.

Preduzeća sa spornom imovinom iz stava 1. ovog člana program privatizacije i početni bilans stanja dužna su sačiniti prema posljednjem završnom računu.

Ako u ukupnom kapitalu preduzeća iz ovog člana postoji i kapital čiji je vlasnik fizičko ili pravno lice, preduzeće je obavezno uraditi reviziju vlasničke strukture kapitala što čini

osnov za izradu početnog bilansa stanja iz prethodnog stava.
Preduzeća iz ovog člana dužna su dostaviti program privatizacije i početni bilans stanja u roku od 30 dana od dana davanja naloga za izradu istih.

Član 4.

Ukoliko preduzeća sa spornom imovinom ne postignu sporazum o usaglašavanju međusobnih odnosa povodom istih prava, stvari, obaveza i kapitala, nadležna agencija će naložiti reviziju vlasničke strukture kapitala preduzeća.

Rezultati revizije iz prethodnog stava čine osnov za izradu početnog bilansa stanja preduzeća.

Program privatizacije i početni bilans stanja preduzeća iz ovog člana dužna su dostaviti Agenciji u roku od 30 dana od dana davanja naloga za izradu istih.

Član 5.

Nadležna agencija provodi proceduru za angažman revizora, vrši njegov izbor i snosi troškove revizije.

Član 6.

Na prodaju državnog kapitala preduzeća iz ovog pravilnika primjenjivat će se pravila prodaje koja je, saglasno članu 14. Zakona, propisala Agencija za privatizaciju u Federaciji Bosne i Hercegovine.

Član 7.

Raspodjela novčanih sredstva ostvarena prodajom državnog kapitala preduzeća iz ovog pravilnika vršit će se na način utvrđen Odlukom o načinu raspolaganja novčanim sredstvima ostvarenim prodajom preduzeća i banaka na teritoriji Federacije Bosne i Hercegovine ("Službene novine Federacije BiH", br. 28/02 i 8/04).

Član 8.

Ovaj pravilnik stupa na snagu danom donošenja, a objavit će se u "Službenim novinama Federacije BiH".